

Yizcouh:

Ca Seizhong Ndaem Haeuxcaeux

Mboengqneix dienheiq cugciemh bienq raeuj, cingq dwg seizndei ndaem haeuxcaeux. Geij ngoenz neix daeuj, Yizcouh Gih lajmbanj gyoengq nungzminz cingq ciengj ca seizhong, ciemz gyaj ndaemnaz.

Bineix doxdaeuj, Yizcouh Gih youq mwh guh ndei gij hong fuengzre gaemhanh binghraq, doengzseiz caenhrengz cujeiz nungzhoh cadawz seizciet ndaemcin, saedbauj mbouj nguh seizhong, bangcoengh fazcanj nungzyez caetliengh sang. Bineix aen gih

neix dajsuenq ndaem haeuxcaeux 13.85 fanh moux, daengz 4 nyied 10 hauh, haeuxcaeux gaenq ndaem 5.66 fanh moux. Seizneix aen gih neix dingzlai nungzhoh gaenq guh ndei gij hong rauq naz bwh ndaem, hainduj haeuj daengz seiz ceiq nyaengq ndaemnaz haenx, yawhgeiq 4 nyied ndawcib daengx gih cienzbouh ndaemnaz sat, beij bi' gvaq daezgonq 7 daengz 10 ngoenz.

(*Cinz Fanghswih*/覃芳思 *Nungz Aicih*/农爱枝 *Veiz Bingjvaz*/韦炳华)

► *Bouxndaemnaz guhhong nyaengqfoedfoed.*



Liujcouh:

Mbanjmyauz Baijyienj “Aeuyah Baehaq”

Ndwen 4 ngoenz 1, Yungzsuij Myauzcuz Swciyen Mungvuh Mbanjmyauz, bouxcoz Myauzcuz cingq baijyienj vunz Myauzcuz aeuyah baehaq. Neix dwg Mungvuh Mbanjmyauz gingjih dajcauh ciengz saedgingj yienjheiq dawz vunz Myauzcuz aeuyah baehaq, cuengqcaeq, caij din venz daengj minzsug funghcingz gyoeb youq itheij ndeu. Yungzsuij fuengzre binghraq doengzseiz, hailangh gingjdenj, dauqfuk lijyouz hangznieb.

(*Liu Swjyenh*/廖子渊)



▲ *Bouxcoz Myauzcuz baijyienj aeuyah baehaq.*

Yungzsuij:

Dangjyenz Bang Duetgungz

4 nyied 12 hauh, Yungzsuij Myauzcuz Swciyen Singhsingh Ciengx Yiengzbya Gyadingz Nungzcangz, boux dangjyenz daiqdaeuz baenzfouq Vuz Cungginh cingq cazyawj duz yiengzbya iq sengmaj cingzgvang. Gaenh bi daeuj, Yungzsuij Cin Yagoz Cunh boux dangjyenz daiqdaeuz baenzfouq Vuz Cungginh giethab saedsaeh, yungh cungj fuengsik gyaeng ciengx caeuq buenq gyaeng ciengx, youq ndaw 2000 lai moux dieg luegbya ciengx yiengz, mouseiq ndaem daengj, caemhcaiq doenggvaq dinghdan hingzsik, daiqdoengh 200 lai hoh ranz gungzhoj caez dajciengx, lij vih vunz ranz gungzhoj daezhawj laemzseiz couhnieb gangjvei, lai roenloh coicaenh nungzminz demsou baenzfouq, bangcoh duetgungz gunggeng.

(*Lungz Linzci*/龙林智 *Yangz Baujanh*/杨保安)

Cingsih: Maksangh Vadung Cin Ndaejsou Lo



▲ *Lwgnyez mbaet maksangh angqvauvau.*

4 nyied 9 hauh, hekyouz youq Cingsih Si Vadung Cin Byalozdoz suenmak gosangh mbaet mak. Gaenh bi daeuj, Cingsih Si Vadung Cin baujmaenh fazcanj ndaem ien, ndaem byaek, ndaem mak, ndaem gosangh daengj canjnieb, cungfaen leihyungh diuzgen ndei gyaudoeng bienhleih, aeu maknongzgoet, makgam, maksangh daengj mak ndei mizmingz bae doidoengh lajmbanj lijyouz canjnieb yungzhab fazcanj, bangcoengh daengx aen cin duetgungz gunggeng, nungzyez dem yauqik, nungzminz demsou.

(*Vangz Anhcungh*/黄安忠)